

وردة في الثلج مريد اليماني

إلى الشتات المفضي إلى التوبة، والحدس المفضي إلى الاعتزال، والإعتزال
المفضي إلى اليقين، واليقين المفضي إلى التجرد، والتجرد المفضي إلى الشهود،
والشهود المفضي إلى الفناء .. والفناء المفضي إلى الله !

--

لم أضع عنواناً لأي قصيدة حتى يجد كل من يقرأ في القصيدة عنواناً يتناسب وإياه
يكيفه على الشعور الذي يشعره ويفيض فيه ويتفجر بداخله- هكذا أرجو- وهكذا
أطمئن..

--

لأن النهايات ماهي إلا بدايات أخرى ..
ولأن الوصول إلى الله بشتى الأنفاس ولكن على صراط واحد ..
لأن الناس مذاهب ..
ولأن الشعر مذهب من مذاهب الوصول..
لأن الله .. هو الله

كتبت ما كتبت .. حتى لا أموت بحسرتي وعنائي! وهو غيض من فيض .. لم
أهذه .. أثرت أن أتركه هكذا حتى لا أدلس على من يقرأ أو يفهم ! كما لا ينبغي
على المخطوبة أن تدلس على خطيبها .. أو العكس ..

بشتاقلك و انت بتضحكلي
و تشيل م الحمل على الكتفين
و اسمعلك و إنت تغنيلي
يا حمام رايح بالحزن لمين
و افكر الصمت اللي ما بيننا
يوزن في عياره نحيب العين
و بحاول أنسى و أقول يمكن
هتدي الأزمة و هما يومين
و الصبر لوحده مبيكفيش
إلا لو صانه جميل الدين
و إنت اللي حميتني من نفسي
نفسى أحميك زيك يا حزين

الشعر مخدر ما بيوصف
إلا نقطة من فيض الفقد
و أنا لما بحس إن الدنيا ضاقت
بلقاك على طول بترد
الدنيا فانية ما تزعلشي
لا لنفسك ولا حتى على حد

قلبك كان صافي مبيكدبش .. سلام الإيد أو حضن الشوق
راسك دايمًا بتبص لتحت .. و قلبك دايمًا متعلق فوق
عمرك ما حاولت تبان غيرك .. و الضحكة ف وشك ضي شروق
سألوا الحبيبة آخركم فين
قالوا ببساطة لفين ما تروح
و أنا ناي مشروح بوجع قلوبين
و حبيبي سابني لوحدي أنوح
و كائي طير من غير جناحين
بيخبي تحت الجرح جروح
بتقولي : ما تتعلقش بحد
علشان تعرف تمشي على الشوك
و كائك عارف إن البعد :
مسافة قلب و هجر أخوك
و بتسأل ليه حبيتك ليه؟
فاضحك و أقول : ماعرفش أنا ليه
فنبص لبعض بلمعة عين
أنا قلبي معاك ف حافظلي عليه
على قد بساطتك كنت بليغ
بتحس تقول و تخاف ف تصون
مجنون من يومك بس مريح
و كلامك من قلبك موزون
و ف صفحة في تواريخ

لبشر مصاننتش العيش و الدين
و أنا لو سألوني مكانك مين
هبيكي و أرد بدمع العين
أنا قلبي معاك فحافظلي عليه
و بتسأل ليه حبيبتك ليه
فاضحك و أقول معرفش أنا ليه!

و عينيك سند للشقيانين

بيطل منها طريق براح

تضحك و ضحك القلب دين

يغسل تعب كل اللي باح

تغزل على نول البصر

معنى الحياة

سارح .. في خطوك مغترب،

بتعاند المأساة

تبكي في نص الليل لو حدم م الفراق.

و انت البصيرة اللي حوت م الداء دواء.

صبرك أيوب ..

أمرك مغلوب ..

مخمو ف الناس..

كل اللي تشوفه بيتجسد .. فيه الإخلاص.

و كأنك مبعوت برسالة،

تمسح ع العين السيالة .. فتخف الروح

أحزانك .. أساطير منسية.

آلامك .. أشجان أغنية .

بتعرّف معنى الحرية .. في حمى النسيان.

نضارتك -مين شاف نضارتك؟- شائلة التباريح

و حنينك للضلع التايه .. تأبين لمسيح

كلامك .. بيشبه نعاس الحبيبة؛

خفيف م التكلف تقيل ف المعاني.

بيخطف حضورك .. هدوء الأماكن

و لكن .. أناني.

مشيت قبل ما أمشي، و سبت الحنين

و أنا تهت منك و معرفش فين؟

و يبكي بكاء اللي جفت ضلوعه، وتاه في انتظاره

و أنا لسه قلبي .. بيشعل ضلوعه .. منارة لرجوعك، و بيزكي ناره

فهكتب لعلّي؛ أدوق التسلّي

و يهدأ جناني ..

و هدعي و أصلي ..

لعلك و علّي؛

نشوف بعض تاني!

خدت معاك:

القلب الهائم في المسافات

و العقل التايه في الإجابات

و ديوان إقبال

و الشوكلاتة ..

و الحزن اللي يساع يُتم الكون

--

أنا هايم مش لاقى إجابة !

أشجان العاجز في ضلوعي

هتوقف : طيش الدبابة !

--

بتفجر فيا الذكرى حنين،

و الشك بيخنق فيا الليل

و أنا مهما ابعد عنك موجود

و كأنك وشم على التفاصيل

--

هدوءك، سكوتك هبوط اضطراري

بيلعن سُعار البلاد الغبية ،

و عينك مدافن لقلب انتحاري

و حزنك سرية ..

--

كأنك رسول الغياب الحضورى

كأنك كأني ، كأني كأنك ..

فى وسط التلاهى: بغنى لأتّك

و أبشر بصوتك فى وذن المآذن

و أغنى كما كنت دوماً بغنى،

لقلبى اللى ساكن: ما بين الأماكن

--

أنا العجز كارى،

و صوتى المؤبد !

أنا البعد طارى

و حصنى المهدد !

أنا اللى انت جارى فى قلبى المسهد

بنادى عليك بالغباب المؤكد:

قتلنى انتظارى !

و بالحب أشهد !

أدمنت الصبرُ

و بكيت لله ..

جففت بدمعي نزيه الآه ..

و مشيت على قلبي ، و قلت بلاه ..

و أنا كل ما أشوفك في البرواز، ألقاك بتقولي: كفانا الله !

يا مهاجر ؟! فينك ! روجي معاك ..

بتطوف وياك و تلبي نِداك ..

و يأذن صوتك في التباريح .. إن إنت هناك !

بسرح في مجاز الوقت : بضيع،

فرعي اللي يمامك حن عليه، بيخر صريع

كم قلت إن أنت .. مشيت لبعيد ،

و أنا عارف إنك مش مبسوط ..

مش عارف حتى أقولك ضيع !

و مكانك جوه ف بطن الحوت ..

و الناي : مقامات .. أولها حزين ؟!

فكفاية عليا أدوق البين ؟!

و أحن كائي أنين ف أنين ؟

و محدش سامع غير الوش !

كل اللي يشوفك يحكي عليك و يقول : معلى !

يا مآخر فرحي ، معادك ايه ؟

أنا قلبي يتيم، و مخبي عليه

عمال بيعيد نفس الكوبليه :

لو كان موجود كان يحصل ايه ؟

و أنا شمعة خلاص بقى زادها رماد

الناس بتشوفها مزاد أوجاع !

سرك مكشوف : أتك متذاع !

و بتحضن بس ملكش دراع !

و الكون بيضيق في عينيك .. بالشوق !

حاطينك طوق ..

ممنوع تخفيه !!

راسمينك شمس .. على الجدران

بيحطوا اللقمة قصادك : كل !

و كأنك كلب جريح و مهان

و يا تاكل من روحك حتة ، يا تموت م الجوع

بتعافر لإزالة السلطة ، ببقاءك حي !

و التهمة : بانك بتسرب للناس الضي !

من ضحكة يدوب إثنين في إثنين ..

و الناس مساكين ..

أطيافهم هايمة في كل ميدان ..

الثورة اللي اتقتلت في المهد ..

بتند العين و تبل الخد ..

و الشهد اللي استنزف روحنا بقى طعم الشوك

و الأصعب إن إنت بتحزن علشان خلوك، و اختاروا أخوك !

بنلف ف دواير ..

بنلف ف سجاير ..

بنلف ف سطور ..

و بنضحك يا عالم

و بنحزن : دهور ..

وردنا فوق الرصيف ..

دمنا شغال نزييف !

اللي يشرب دم أخويا .. يبقى فارس !

و اللي يمشي فوق جثتنا .. بالمتارس يبقى فارس !

و اللي بخر كل فكرة .. في الغبار ..

و اللي قال : بالعند هرسم .. موتوه بضغطة زرار ..

هاتلي يابني الكلب ده !

هاتلي يابني من الحصار .. كل شمس بتبتسم تغزل نهار !

شعبنا .. كيفه المذلة !

طلعوا فيه المهازل ..

اللي يضحك كتفوه ..

و اللي يحزن كتفوه !

و اللي متلقيهوش ف بيته .. هاتوا أخوه !

ارسموا له خط واحد .. و اكتبوا فوقه الإله

كعموا بالضرب بكره .. بيتولد من كل آه ..

علموه إن القضية = فكرة .. من وحي المهانة

فاحفروا قبره بمهانة

و لبسوه توب الإدانة !

بس عارف ..

القبر أحن من الأوطان ..

القبر براح .. بتنام مرتاح و تقوم مرتاح ..

معليكش تجيب لإبنك ف العيد : هدمة و كاوتش

معلكش تغمض لما تشوف .. هذا الإسكتش ..

أنا كان مالي و مال السيرة !

يا سبحة على إزارة بييرة !

يا اللي انتي على سرير العسكر

بتكوني بهية و شاكيراً ..

أرضك تتباع حنة ب حنة

و التعلب نط على البطة ..

علشان عواجز تحكم عواجز

نطوا في أرابيز

شعب بيتلب ..

و الكفتة خلاص دخلت ف الطب

و تغني حبيبي يا نور العين

تفتح شباك واحد ببسب ..

مش هحلف بس أنا هرمي يمين

و أدي واحدة شمال و أدي واحدة يمين

و الزحمة تخسس أي تخين !

مجانين يا أبيه ، مجانين يا مدام ..
عاشين فاصل ، عاشين إعلان ..
الكل بيضحك و يبشر بقدوم الغد !
مفيناش و لا واحد بيفكر يغلط في العد !
الكرش مادام .. مليون = مستور
لو ابني هيبجي عليه الدور ، هعملي نفسي عبد المأمور
أنا عندي أعيش مخفوض الراس..
ولا إني أفكر أشوف النور ؟!
أنا عندي علاج ، واقف في الصف !
لو قالوا ارجع ! برجع للخلف ..
لو قالوا اخشع ! بخشع ميت ألف ..
أنا كنت بفكر في التغيير
أنا كنت بوشوش نفسي بفعل الخير
و بقيت مهزوم ..
بصحى من النوم .. مخضوض و مريض
أحلامي اللي اتوأدت لسه ، بتروح لبعيد !
و كأني بموت .. و كأني رخام !
أوعى تفكر ! تفكيرك سام !
ممنوع تلمس عقلك أحلام ؟!
الدين موجود ، و الدين ليه حدود
و حدود الدين .. إنك بتجود .. لولاد الناس ؟!
خد يا بن الكلب يا واطي نهه !

انت نسيت إنك عسكري فرد !

و كما بتقولي كلام و ترد ؟!

ع الحجز يا كلب .

بين الجدران ؟!

و أنا عندي أموت .. مخنوق بالغاز

ولا إني أتهان ..

أنا ثرت عشان .. أنا علوز أعيش

لو قالوا بلاش :ميتين الجيش !

أنا ثرت عشان أنا علوز أعيش !

فمتوصفليش الحلم ازاي ؟

أنا عندي أموت و لا إني اتهان !

عبد الرحمن موعدش و خان !

أنا عايش من غيره .. في غربة !

و الغربة أساساً بالمجان !

عبد الرحمن موعدش و خان

أدمنت الصبر

و بكيت لله ..

جففت بدمعي نزيه الآه ..

و مشيت على قلبي ، و قلت بلاه ..

و أنا كل ما أشوفك في البرواز ، ألقاك بتقولي: كفانا الله !

كفانا الله !

من قلبك حبيبتني لقيتني

من قلبي بقولك حبيبتك

و فضلت بتحكي: تبكيني

و حاولت أوقف: بكيتك

بصيت في عينيا لقيت روعي، قنديل متنور من زيتك

هضحك على نفسي و أكذبها،

و أقول بالعافية إني نسيته؟!!

و إزاي أنساك و انت فديتني،

بعينيك وأنا عمري ما فديتك

--

منحول من هم الناس منحول

أوتار أوجاعك مغزل نول

منحول من هم الناس منحول

من بعد الساعة 2 بالليل، بتجيلك نوبة خوف و ذهول

--

بتعانده ليه و تقولي مفيش ؟

فتشت عينيك محضر تفتيش

بتعانده ليه و تقولي مفيش ؟

هو انت لوحداك، قد الكون ؟

بتشيل في الموج أوجاع الناس؟

بتخفف عنهم : لما يزيد،

زن الوسواس ؟

بتعاند ليه و تقولي مفيش؟

و أنا قسوة قلبي عليك: بالغصب

ما أنا ياما مشيت وياك و لقيت .. في حنانك قلب

بتخبي الخوف؟ ما الخوف متشاف

بتضم لصدرك حزن إيديك،

و كأنك غصن شجر صفصاف

ملفوف على نفسه بكل غياب،

زي السماعة الملفوفة،

مهما يحاول فيها لوحده،

هتظل محاولاته سخيفة !

--

أنا زيك يمكن في المأساة،

بمشي في شوارع جوايا

النعل المسحول م الماضي

و لهيبي و حزني و بكايا

خلوني أفكر ميت مرة،

قبل ما أشارك حد حكاية

لكن في خير في الناس لسه

أيوه بصحيح هما أبالسه

لكن في خير في الناس لسه

في ناس تشبهنا بتتعذب
من عتمة آلامها الخاصة

--

قدامك في القلب مغارة
و عينيك: هتنور ليك الخلق
في ناس بنشوفها نحس بنور
و في ناس بتجيبلك غصة حلق
فعليك تختار؟

و اعلم يا حماز ..

إن الدنيا فيها و فيها ..

قبل أما تداوي وجع غيرك

حاسب على نفسك و داويها.

هنيهةً هنيهةً ..

و انتي يا شاطرة من هنا

و لا انتِ تايهة؟

سيرى على حبل الألم سيرى

علشان ما يقدر يلمحك غيرى ..

وطني .. خيالك وارتجالك

مش فيلا في حي الزمالك ..

ولا باع في تعذيب العذارى

خمارة يا أمو الفتنة ليه خمارة؟

بتسكرى على دمعي ولا:

بتتعى أوجاع اللي سابك

فروسياتي ماتت بزلة:

على حس صوتك ف المعارك

و انت القتيلة القاتلة ..

في الجرح ليه متسلسلة ..

زيك .. فقير .. لكن بغير

وأنسل من تحت الحنين في الجلد

و لي في تعريف الزمان : -في بلاد زمان- ييجي ألف ولد ..

ولادة يا ست البشر زيدون ..

مترصدينله ف قرطبة : بالناس ..

يضعف : ترف الذكرى في عيونه ، تخونه ، يعذله الحراس ..

مفتول خياله من نسيج الخلاص.

كل الجروح دي ندوب ؟!..

يمكن علينا ذنوب ؟

الشك كارك .. و انتي مش حاسه ..

و العين في عينك بس مش باصه

لو بس .. ينفع لو أنول بصة ..

كنت هموت قبل أما أغنيك ..

لموا الجباية عشان أطلت النظر

لموا عزايا عشان أشحت البصر

بحلف بإسمك لما زاد المطر ..

إني بقلبي ليكي كل : نبيل ..

بالشمس ليه تتكحلى للخلق ..

متبرجة بالشوق ..

و النبض زي الطلق ..

علشان بغير .. قولتيلي موث ..

علشان بطير وطلعلي صوت ..

شافني الغفير و حفرلي فخ ..

لا نفعني أخت ، لا نفعني أخ ..

و نزلت على قلبي طراخ طراخ !!

و ندهت بإسمك : قالوا يا بن الكلب

مين اللي باعتك:يللا انطق قول !
اللي بعنتي : يا غغيرها : رسول
طلبت في عينها ، فاسألوا عينها
أنا دينها ديني و ديني ده دينها ..
لما الذهول في النظرة يدمنها ..
بفتح و أقول : أشعاري بإستبسال ..
يا ناس بتفهم في الزجل غنوا
إن الأسد عند المحبة غزال

(2)

يا ناس بتفهم في الزجل غنوا
إن الأسد عند المحبة غزال !
و إن الحقيقة في الطريق نفسه
و إن الجلد مقسوم ،
و الإشتياق نصه ..
كائن بلا أحزان ..
كائن ضعيف و جبان ..
كائن في شكل الموت ..
بتفرقه الأزمان ..
مكتوب عليك الحيرة في المتاهات
و الدندنة بالشعر في وصف البنات ..
و المشي فوق النار ..
وهيا شايفة لهفتك للحتف ،

بتعاجل الطلقة ، بقبلة في الهواء
و انت المسافة الفاصلة بين الشفايف و النداء
لما تناديك : حبني .. اشربْ لحد ما ترتوى
و اعطش للحن الإنتهاء ..

(3)

عصفور جريح و النظرة سهم القدر ..
لو أطرقت يبقي وجودك خطر
لو رفرفت نلت الشهادة ف السما الأولى
يا مجيشة الأنفاس، الدمعة مبذولة
بين الضلوع الضحكة : ألف ضريح
ريشة شيطان .. متجسمة في الريح
و انتي نويتني .. إن الصراط يمتد
مشيني فوق الرموش سفير للخد
أصل العذول ماناموش
و الليل طويل مبينتهيش،
إلا إذا جيتي،
و أنا بس بترجي تشوفي دمعتي،
فأبكي لنفسك مرة ..
و أبكي إذا بكيتي !

(4)

بلقى نفسي بحن ثاني ..
في المنام بغزل أمانني !

فيقولولي: "هيا .. تاني ؟!"

بس لما في المراية شفت قلبي

قلت أرق لنفسى مرة ..

هيا لو عايزة هتيجي

ولو مجتشى !! هيا حرة !!

من غير مناهدة ولا عتاب
الحب ليه أجمل عذاب ؟
ببزورني يوم .. ويجافي يوم
و في عز نومي يقولي : قوم
و بعد وياه النجوم ،
و أما احضنه؛ يطلع .. سراب !
حببت حبيبي محبتيش
و لفحني من ريح السموم
و بموت في حبه عشان أعيش
قالني مفيش : و كفاية لوم !!
بالروح جذبني .. ندرت ندر
إني مقولش : يا صبر صبر !
و النظرة منه لو بغدر .. يارب .. دوم !
ع الصخر برسم في الخيال
آيسني منه : كل حال
فمشيت إليه ..
من خوفي منه لجأت ليه ..
وأما رآني : قالني ليه .. الحزن طال؟
يشكو إليّ غزال كحيل !
فافرشله قلبي سلسليل

يزهدني و يقولى :الرحيل .. مكتوب عليه !

مش قادر أنسى من سنين

و لا قلت ليل ولا قلت عين

ولا حتى عارف : هو فين ؟

و العمر بكرة فيلم بالشقlob ..

مكتوب عليك لما تحب تدوب ..

بتكر حزنك فاشربه بشویش

و المنتهى : أسئلة .. مفیش إجابات

و انت الصبي المجذوب، في حضرة المحبوب،

بتنسى الذات ..

خشوعك في الفناء: محمود

و قلبك ع الحنين : شاهد

و دمك في الفراق : مشهود

فسل الشوق بأضلاعك كأن الآه وتر مشدود

سوناتا الكون بيعزفها، عزاءً ليك

و ضي الحب بيلالي في نن عينيك

و ترضى بالوجع تلاقيه يقولك: ربنا يخليك !

ما بين نفسك و بين نفسي .. يدوب تفكير

دواير لففتنا كتير،

رجعنا نقول يا ريت و يا ريت !

معايا في كل شيء ناقص

معاكي كل شيء يكمل

فهل ممكن تناوشيني كأني سِجالْ

كأني طفل على بابك .

بنظرة يتم بصيلي

عينيكى هيا تأويلي .. لكل محال

بفسر كل شيء بيها

و قلبي يا ربيع القلب : لونه خريف

غصونه : بتبكي ألوانها بشكل مخيف

و ناحت ع الغصون .. يمامات

و مل السيف ..

و أنا لوحدي ..

هعيش وحدي ..

و أموت وحدي ..

كنازح م السما للأرض

عينيه مسرح،

و صوته أجش م الغربية

ولما بتعذله الأيام ..

تضيق الأرض لو رحبة !

و كم قبله و كم بعده

ببشكي القلب من بُعد

و هو في أمل بعده ؟

أمل وداني ورماني

في بئر الحب خلاني وحلاني

و يكفي إنه لو جاني ..

هموت مبسوط ..

فيارب الحبيب يرضى

باني أموت !

في الخلفية صوت ناي

--

في اليم ، كنت بعوم
سلبت خيالي، و أنا الفقير .. وهيا راس القوم

--

مر التاريخ : شكني .. و رماني بالسفسطة.

قلت لخيالي : يا خيالي متى ؟

قالي: الحقيقة سهلة و مبسطة ؟

لو غاوي تشرب يبقى ندر تصوم

--

ضعفي الشهى : أوجد..

من نأيتها : استبسال

دحرج سنيته في هدمة خيش و رحال

لا نابه منها مقام ولا نابه منها حال

كتبوا على قبره: جدع طويل البال

--

سميتني قبل ما أغيب : الميت الصاحي

ضميتها ضمة حبيب : بينادي يا جراحي

و إن كان عذابك قدر، نور العيون ماحي

بيهدد المُنْتَظَر و يلحن الموال !

--

أمسيت بشقق كل ليل عتمة
بحفر بهمسي الجدار، و أبعثلها نسمة
كوني بلا أموال .. لا يعني إني فقير
الفقر فقر قلوب : بتداري ع البسمة

--

أول شهيد يشهد: إن الوصال معدوم
لا بيروي حلق الشهيد إلا أنين الكروم
و السكر مش عريضة، السكر ده حالة
تاخذك لآخر مدى .. و ترجعك محروم

--

امتى بقى ترجع: أحكيها تعذرني
من غيرها كنت بموت،
من غيرها كنت بعيش ..
يا حزن خد روعي : يمكن تصبرني

--

سنت عليا السنين:و رميتني بإحتمالات
رمتها عيني بحنين؛ فقالتلي عدى و فات
لساك بتسأل أسئلة: ملقيتلهاش إجابات !
آن الأوان تبتدي ، بالعافية تنكرني

--

بَكَّيتني زي ما أكون، مغلوب على أمري
قالولي: يا مجنون ، و اتغزلوا بشعري !
و جابولي كل البنات .. وقفوا على قبري
يا رب على حبها : امتى هتنصرنى؟

--

كان الوداع خافت، لكنه كان ممتد
أول دقيقة وداع، و القلب بطل عد
و قال لنفسه بلوم: من امتى حب بجد؟

--

مشي في شوارع، فاضية و ملغمة
مليانة حزن و ذكريات مؤلمة
هنا قال : بحبك قد نور السما
و هناك: بيقطف من عينيها رحيل

--

قالت له مرة: انت أول حد !
و قالتله مرة: إنت آخر حد؟!
و اللي ما بينهم محض حبكة سرد
للي يحب الدراما و يعشق التمثيل

--

كانت ايديها ف ايديه: محفورة بالمللي
كانت عينيها ف عينية: فقالتله: ها قل لي:
لسه في عينيا : بتدعي و تصلي

و لا انت زاهد في الغرام و الليل

--

اللي يشوفها الآن: ميقولش دي هيا

اللي حصل ده بحق؟، ولا دي تمثيلية؟!!

--

في اليم كنت بعوم ، بس الخيال شارد

قبل أما نتقابل .. قررنا نتباعد !

هل عرفت الله مثلي في الثنايا

في التجلي للأحبة،

وقت تقديم العطايا

في ابتداء المشي ليا،

لما قلبي كان يبجي

كنت بصرخ: تهت منك!

و أنت جنبي

بتراعيني بالنعم وقت المعاصي

كنت أهوج ... لما جيتلك .. كنت ناسي

كنت بترجأك بدمعي،

و انت تمسح فوق جوارحي

صرت من فرحي بغني:

انت فرحي !

الجمال في جماله منك

و الغياب في الذوق .. علامة

انغماسي في افتقاري،

و اتصافي ببيك .. كرامة

و الوسيلة إني أبوحلك،

قبل ما تقوم .. القيامة

و أبقى واقف بإنكساري

و اعترف إني .. جهول
و انت من غيرتك .. تقول:
اعترافك ده .. وصول
كنت في الدنيا بتسرح
في السما علشان تشوف
قلتك بجمال كليمي:
اقترب! و انسى الحروف
و انسى كل حبيب سوايا
هل رأيت الله مثلي .. في الثنايا

--

هل كان الحب هو المأمول

ولا الحالة في الحب تطول

--

عُيُونُكَ غزاة بتعشق سهامها ..

تلمس خيالك فيحضن قوامها

.. تفتح فتبعد .. تغمض تقرب

تشاور تلبي .. تبين فتهرب..

تتوبها تجيلك .. تدبح في ليلك ..

و تحزن فتبكي .. فتنزل دموعها ..

تقول مش بحبك .. تقولك عاذلني ..

تقول لأ بحبك .. تقولك غازلني ..

كأنك و هيا .. حقيقة و خلافها .. بنظرة تسامح و نظرة تخافها ..

و أكثر حقيقة هي إنك كارها .. عشان لسه قلبك بيعشق حروفها ..

--

هل كان الحب هو المأمول

ولا الحالة في الحب .. تطول؟

--

سميتك زي ماقال سيدي و أنا سيدي هوايا و بناته

لو طال القلب يبوس قلبك هيوسه يا آخر ستاته

و أنا قلبي مجاز إنه يحبك .. على خيبته .. بميت ألف طريقة

براحة عليا .. ده أنا لسه .. عيل .. و الروح لسه بريئة

--

الجلد ..

شق الجسد ..

و الحنين طاعن في أوصالي

كان كل ده هيهون ..

لو غبتي عن بالي ..

و أكمل في الفضا : تايه

و أقابل حد معرفهوش

و يغريني الفضا فأعشق

و يغريني المكان فأدخل

و أشوفك و انتي بتحبيه ..

و أقولك : ذنبي أنا كان ايه ؟!

عشان يجمعنا بس الجرح ..

و نضحك ضحكة مش صافية

و يعزف لحن سولو كمان ..

و أقولك لو يساع القلب :

فأنا تايه بلا عنوان !

و لسه في قلبي ليكي مكان

عشان ..

ترمي الصبابة عليه ..

و نضحك ضحكة لونها غريب

و نعمل نفسنا مجاذيب ..

أقول : الله ، تقولي : طبيب

أقول: يا حب ليك علامات

و أولها :

شروذ البال ،

و كتر الحيرة في المسافات

و ثانيها :

غياب النوم ..

و ثالثها:

افتعال الشوق

و رابعها :

في كل شروق بشوفك شعلة رباني

و خامسها:

جمالك حق ،

و سادسها :

هتافك حق :

و سابعها :

يغيب الحق !

لما تكوني واحشاني !

إعلان:

أم كلثوم تغني: أغدا ألقاك؟

--

الورد محافظ ع الأشواك،

بيفض عينين عاشق غلبان

في العزلة يغني: متى ألقاك؟

و في وشه يقوله: ملكش أمان

و ما بين القسوة ساعات بيحن

يقوله : تعالى نفكر إن:

لو كنت معاك .. في الجنة هناك

هنعيش إزاي ؟

يفرك في عينيه، و يرد يقول:

هنعيش إزاي ؟!

هنعيش عاشقين !

و دي عاوزه سؤال ؟

الجنة أساساً للعشاق،

و أنا لأجلك سبت الحور العين !

لابسين فساتين من نور الله،

و بيغزلوا من شعري الدوايين.

و أنا لأجلك سبت الحور العين !

-أغنيها لك طيب ؟! -

من حسنك : خدت الحب نجاة

و طريق ممدود ..

و أنا أكثر حاجة بخاف لتكون

إنني أزهد فيكي و أنا المزهود

أنا دمع رسول .. ببيل نداه

جذب الأوتار

برسم بالمعنى : تفاصيلك،

و بجسد فيكي: حنين الدار

--

أنا شایل صُورتك جوه الكاس،

علشان يتخمر فيا الصبر،

و بخاف لأشكيك بعينيا لناس

يرفعوا أمري لولي الأمر ..

و أقول أشعار، ترضي العذال؟

و أغني يا ليل ، و أغني يا عين

العشق حلال !

لكن يا غزال :

مالك بتغيب و بتحدف عينك للملكوت.

هو اللي سفاك نساك أنا مين ؟

ما ترد عليا .. كفاية سكوت

--

هكتبك كل يومين مرسال،
مختوم بلهيب أشجان و غرام
و هرد غيابك في الأطلال
إن أنت آمنت الهجر حرام

--

الليل زكاك خلاك قنديل،
و أنا عبد ضعيف بيبيع مناديل،
على شط الحب .. !
من علو النظرة وقعت قتيل،
كان آخري أستنظر منك عطف،
طمعت بقلب ..

و رسمت طريق: مرسوم بالروح
و فضلت أشب .. !

--

الصوت متركب ع الصورة
و أنا ظني بيستفرد بيا،
و بيلعب بيقيني الكورة
إزاي ؟ هقنعها تصدقني
و انا بحلف بعينيا العورة !

--

بستهزء بيا و أهزقني

و بتكبر في دماغي الفكرة

و سنين العمر تبعزقني

لإمبارح بس بلون بكره

و أبص لنفسي تخوزقني

و أفضل متعلق ع الأوكرة

--

بتمشى خيالي ببسبقتني

و يجازف و يقولني تعالى

و أكذب قلبي يصدقني

و يقولني إن الكذب ندالة

على بابك، متحمل صدك

العيب ع الكلب المتمرط،

العيب عمره ما كان من عندك

سامحيني جريتلك من غلبي،

و أنا عمري ما فكرت ف ردك

--

الورد محافظ ع الأشواك

بيفض عينين عاشق غلبان

و طلع بيغني : أغدا ألقاك؟

علشان متأثر بالإعلان.

كل الكلام اتقال
كل السكوت شرحو
مطرح ايديها الخفاف
أنا قلبي زاد جرحو
و مشيت في سكة سفر
لكن بدون اتجاه
و قابلت متغربين
عن يعني ايه الحياة
بنحن لكن مفيش
في اليد ولا حيلة
شايلين جنيه ف جنيه
و هنخسر الشيلة
و لواالإيجار موجود
بكره مهش ضامين
بنحب بس النصيب
رايح لناس تانيين ..
أدمنت كلمة آه
و أنا قصدي كلمة لأ
و عشان مكنش غريب
بطلت أقول الحق ..

أراجوز في سيرك الجنون

بتحاصره كل العيون

الطفل جواه : بيسأل

أنا ايه ؟ أنا من أكون؟

--

كل الكلام اتقال

كل السكوت شرحو

مطرح إيديها الخفاف

أنا قلبي زاد جرحه

و مشيت في سكة سفر

لكن بدون اتجاه

و قابلت متغربين

عن يعني ايه الحياة

صاحبي اللي قالي معاك

سابني لوحدي أغرق

مع إنه كان بيقول

بين الصحاب مبدأ

و أنا لما ضهري انكسر

ملقتش ولا عكاز

على ايه و ليه هبتسم

و أنا كان طريقي مجاز

أمي قالتلي السما

مليانة .. بالإشارات

حسيت بريد الغيب

مبعوتلي فيه جوابات

و آمنت زي الطير

إن اليقين في الله

و عرفت بعد عذاب

ايه هوا معنى الحياه

--

في الذكر بمدح و أتوه

و أحلف ب لو عرفوه

و أكنس بقلبي التراب

و أصرخ و أقول: ياهوه

أفنييت وجودي في هواه

و عزايا إني معاه

يغنيني بمعيته

عن كل شيء إلاه

في الوصف ملهوش مثيل

في وجوده : هو الدليل

عرفانه : إنك عليل

و مفيش أطبة سواه

مخذلش عبده الضعيف

ولا سابه ولا مرة ..

يا رب لطفك خفيف

في الضرا و السرا !

جننا لنخرج العباد من عبادة العباد إلي عبادة ربّ العباد

يا أيها المسجون في بيت مسجون

حلقة تلف .. في رأس مال قلّة

العُرف أصلاً كان ب ايه محكوم ؟!

وقت أما نعرف هيا دي العلّة !

--

الحب ليه بتوقّفه الشهادات

و العُرب ليه بيقلّدوا الخواجات

و المصلحة : تحكم علي اللي يعيش

إنه .. بحلمه .. يحصل الأموات

--

--

لما الذكي من صغره حَسْ .. فشل

يبقي الغبي : هنشوف ف عينه أمل ؟

لما الجميلة .. اختارت الجوهر

يبقي العتب ع الشوف ولا على المظهر

--

يا مشيلينا حاجات منتشالشي !

أكياس هوا بتفرقوها ف وشنا
الحلو عيبه إنه ميكملشي
و الحلو أصلاً مات و عوده اتني

--

قافلين علي نفسنا .. عشان خافين
مترهبنين ف الصومعة الهشة
لابسين وشوش خلطنا بين البين
كتاكيث هتفضل ف السطوح عايشة

--

هتلر قالوله : خلاص بلاش ترسم
بالعرف بس اغتالوا: شوف كام روح !
يا أيها الكوكب قبل أما تنقسم
ركبنا فوق الريح : سفينة نوح

--

ركبنا حتي يا عم أي خيال
عيشنا حالة مشيها بطال
طول ما الوجود بيساوي بيهم عدم
يبقي خلاص ملعون أبوك يا ندم !

--

يا شقيانين الكف و اللهجة
يا مزوغين م اللحظة بالبهجة
ما انتوش قطع .. يتساق كما النعجة

--

يا أهل خَفُوا الضَّغْطَ : بيطرّف
يا بنوك تشرّد بس و تصرّف
قبل ما تأمر بالسؤال : عرّف !

--

يا مربينا علي الكمال : ناقص
هيعيب ف ايه الجمال :
لو حد مش باصص !

--

هوا عشان دكتور بيحترموه
سألوه : لقوه : أمي
هوا عشان : شاعر بيفتكروه
راجل .. يا دوب .. عامي !

--

العبرة بالخبرة ..
و الخبرة لازم شغل
و الشغل بالخبرة ..
و منين تخش الفازة
ف الإبرة ؟!

--

اللي اتزنق ف الحيطه حنلها

و اللي اتوجع : م الغربية غنّالها

و اللي : تقولّه البلد :

هيقولك : ايه .. مالها ؟!

--

لما واجهت الناس بأحلامهم

لقيت الحلم : شيء ماديّ

لما واجهت الناس بإيمانهم

لقيت الحلم : ببيعدّي !

--

كان الطريق مرسوم

شلنا الغبار .. ف اتضح

يا أيها المهزوم

متخافش من قوس قزح

--

--أنا العادى !

متستغربش ..

أنا العادى !

ملزق فى الوجع .. مَهْرَبْشْ

ودايماً قهوتى سودة ..

ودايماً دمعنى سودة ..

و كل ما أقول هتتحسن ..

متتحسنش ..

مشيت و العمر تابع ليا زى الضل ..

ساعات بيزيد ..

ساعات بيقفل ..

ساعات جداً،

يكون بينى و بين الحل

ما بين العين و بين الرمش ..

لكن ماوصلش !!

بخش ف جيب .. و أطل ف جيب

كانى .. فار بيتسلل ..

و كل سؤال ؟ عليه علل ..

و كل ما أشوف أقول طوّل

و بزهدق من وشوش بلبسها في الأول

وبعديها أحاول إنني أكسرهما .. متتكسرش

ما أنا أصلى .. حروف اتلخبطت فوق بعض

تجرب .. تيجي كده بالطول ..

تميل للعرض ..

تركبني القصيدة أمير على الدابة

و أخش في عين حبيبة قلبي و اتخبى

و أكون منديل لاعب خفة ..

ياخذنى الحلم لفلسطين على الضفة

فأشوف .. طنطورة و الفتیان ..

و أدوق المريمية كمان ..

و أكون زنبق ..

و أغنى يا ظريف الطول .. متتأخرش

أنا اتكعبلت فى الماضى ..

فخادنى حنين ..

ومش بسأل لفين رايعين .. !

مادام مش حاجة تخزى العين ..

هشوف النجمة تتحمى من الشلال ..

و عينها فى عيني تيجى يمين و تيجى شمال

و أقول يا مهرك الغالى ؟! يا لوز اللوز ..

تقولى : تعالى و املى الكوز ..

فأقول يا شاطرة أنا هدفع قسايدى الحاف

فلو ينفع .. على إستحياء .. لا تتمايعى !!

و تتمانعى !!

و كونى كاملة الأوصاف ..

أبوها شيخ .. إمام و خطيب ..

و عداه العيب ..

ف قالى إحنا فى مدين .. نجوز للفتى توأم ..

فقلت يا حج طيب .. و الهوى يلزم،

بواحدة و بس ..

فقالى : مدين السماوات .. غير التانيين ..

هناك الفطرة حاجة و عندنا حاجة ..

غلطت و قلت بسداجة : أنا مقبلش

سافرت كثير و أنا قاعد ..

على الشباك .. وحيد و حزين ..

و كل ما أقول خلاص هوصل لبكره أشوفه بيعاند ..

يشوفنى عجوز : يقول صامد أقول صامد

لايعرفنى .. و لا عارفه ؟

ولكن دقنا نفس الكاس ..

صداع فى الراس .. ينزل منى تفاحة ..

و لا تسأل عن الراحة .. لأن الراحة دى يوتوبيا !!

و بتجلى ساعات فوبيا ..

من التفكير ..

ف بغسل راسى عندى الزير ..

يضيع الشعر من راسى ..

فأخف كثير ..

فبيجى الوحى يهمسلى : متأخرش ..

بدور فى النار على البردين،

و بقرأ آية الكرسي ..

و كل ما ببندى أقرأ ..

يطوف السحر فى كريستالة الساحر ..

أقول أكثر ..

يقوم السحر .. يتوزع يدور دابر

أقول أكثر ..

فأخف .. و دمعتي تنزل قوافي تزلزل المارد ..

فأكون عادي !!

أنا العادي ..

متستغربش

خدت ايه ؟

خدت م الثورة : الأغاني

خدت م العسكر : كتافه

خدت م الإخوان : خلافة

خدت م الثائر : هتافه

خدت ايه ؟

خدت الملامه

و إني مش فاهم و أكمل

و إن لما دموعي تنزل

يحسبوها .. إبتسامه

خدت من مسئولي: دو غما

خدت من مسئوله : صدمة

خدت م السلم : ركوبه

و اتركبث

انت ايه ؟ انت اتغلبث

الشريحة و القطيع

و الجميع يمحي الجميع

و اني مهما هيدبحوني :

مش هبيع ؟!

و اللي باغ ؟

و اللي خان ؟

و اللي تاجر بالعقيدة و الدولار هو الأمان

و اللي باغ كل اللي حيلته للزمان

و الزمان عرّاه : و دانه

و اللي هان الود هانه

و اللي يسجد للمتاهة ..

و المتاهة .. مش متاهة

و اللي : لما قالوله جنة : قال بلاها

كان نساها

يبقي ايه خدته وفاضل : غير سفاهة !

--

الثورة هاجت أدمنت دمي !

عايزينها سني : في الديبح سمّي !

عايزينها شوري : يبقي ف الإرشاد

عايزين حادثة : يحكم الأوغاد

اليسار زي اليمين ..

و اليمين زي اليسار

و القانون يحمي : الأمين

لما يقتل ف الصغار ..

الموت تجيله في البراخ كوابيس

تقلق منامة عشان شهيد قرب

الضحكة مش بتبين المنهج

لكن أكيد بتبين : المطلب !

واللي قاعد ف الفنادق

و اللي ثابت ف الخنادق

و اللي ضايغ بس صادق

و اللي باديء ..

و اللي ناهي

و اللي أمر بالتلاهي !

و الدواهي والسواهي

و اللي تابع للي تابع للي تابع

و اللي بيقول إنه سامع

و اللي مش شايف و واقف

و اللي جرحه .. جرح غيره

و اللي حلمه : راح .. أسيره

و اللي و اللي

يا اللي يا اللي

قولي قولي

احنا فين ؟

احنا فين ؟

--

خرموا السفينة و أنكروا موتك

ومادمت ميّت .. يبقى ب شروطك !

--

حد فاهم ايه بيجرى ؟!

ايه بيجرى حد فاهم ..

الخبر لحظة وقوعه

كان بينزل ع السلالم

في اللي مات من عين عذولة

و اللي مات من عين خجولة

و اللي مات م الإنتظار ..

و اللي مات طمعان في حظُّه

و الحياة لعبة قمار ..

في اللي راهن ع الحقايق

و اللي تاجر بالظروف

و اللي قال طول عمره : حاضر

لسه في ف ملامحه خوف

و احنا أنابيب اختبار

لإحتمالات .. مش أكيدة

العلل مش واضحة لينا

رغم رغبتنا العنيدة ..

الطريق .. واسع و فاضي

رغم وسعه لسه ضيق

و اللي قرر إنه يمشي

قبل ما يبدأ : يصدق:

احنا مش أصحاب مباديء

إحنا بس أصحاب مرض ..

هات و خد

أو خد هات ..

هو ده كان الغرض ..

التطلع للأمانى ..

خلا قلبي يشيب في صغره

وسط دندنة الأغاني

في قلوب راح تفترق ..

احنا نمل رموله سكر

فاتخانقنا ع اللي يسبق

و اللي بص فوق حواجه

كان مهدد بالغرق ..

في البداية .. قلت ماشي

في النهاية .. قلبي حن

لما تابت كل رغبة

قالوا توب .. أنا قلت لن !

اعذريني إن قلت خائف
أصل شايف حبي ضعف
و إن حنيني .. يمد خطوة
الجروح بتردد .. ألف
كنت زيك .. بردو ساذج
كنت عايز كل حاجة ..
بس ده طبع الحياة
إننا .. نبطل سذاجة
اللي مش عايزينه .. يحصل
و اللي مش عارفينه .. أفضل
و ف بريد القلب دايماً
في سيناريو مش بيكمل
الليالي جزء منا ..
و الندم سمم بدننا
و الألم .. فوق احتمالنا
و احنا .. تايهين في المشاعر
لما بحت : قالولي شاعر
و أما بصرخ .. يكتموني
و أما ببكي .. بيحرموني
من بكايا ..

هيا ليه الدنيا دايمًا
بتعاملنا بالخطايا ..
الفقير فيها مالها
و الغني فيها فقير
و اللي فاكّر إنه ممكن
بيجي مرة منها خير
يبقي مفهمش .. الحكاية ..
اللي عايز يوم تشوفه
المراية : توريهولك ..
و انت لو غمضت عينك
عن .. جمالها : هتديهولك
البلاد .. مطرح ما قلبك
و الصديق : زيك في غُلباك
و الحبيب : لسه مجاش
و اللي داس على قلبه .. راجل
اللي داس على قلبه .. عاش .

الطريق..

محفوف ببؤسه..

قلبنا محشور في نفسه

كل ما نقرب بنبعد

يتحرق في الضلع يأسه

صوتنا طالع بس سادي وعنجهي ملهوش ملامح

افترقنا بس لسه، روحنا ساكنة في كل مطرح م المطارح

واللي سارح في انتظاره، لف بيه عقرب ساعاته

لدغه من ضعفه ونحيبه، وعلمه يزهد حياته

كنا ناويين ع الممارسة، بس خوفنا كان ملازم

كنا ناسيين كل همسة .. بتخلق الحزن المقاوم

انهزامنا كان حقيقي لما ناح في اللحن كاظم

والعراق على بعد شارع..من جناحنا الإعتباري

قلت أنا بايع بطاقتي؟ حد شاري

قلت أنا بايع برائتي؟ في كل مستوصف تجاري

حد شاري؟

الملايكة جرجرتني،

والفلاسفة عيروني !

قلتي : أسفة؟ دمعتين؟ هيغيروني؟

بعد ما بعث اللي فاضل.. لسه فاضل ايه أبيععه؟

ببتسم لكن بدمع.. قلبي مقطوف من ربيعہ
يا حشود نـيرون بـيجـهـز، لأجل يستعرض جيوشه
لما قالوا عليه: بيعشق! خانه طيشه !
والعراق على بعد ميل..
آه يا ليل طولت ليه؟ قصدك ايه من كل غيبة
ضحكتك : قاسية ومريية!
لأ حقيقي ؟ قصدك ايه من كل غيبة؟
الشموع ترقص لموتها،
وصوت يسوع بيقول كفاية؟
جنة الخلد الحقيقي؟ مش معايا
والصباح مفلوق جبينه ..
الرومان شانقينه شنق !
والجموع واقفة تشجع : يحيا صوتنا الانتحاري
قلت أنا بايع : جرائتي .. آه يا عاري !
حد شاري؟
يا فينيق ؟ فرحان بريشه؟
يا إله ؟ جوه القصص ..
مين بيختار أكل عيشه؟
أو بيتحدى الفرص؟
و الصحابة في المغازي ..
الصحابة في السير ..
لما مات سيدنا الحسين: العقاب كان التتر!

كلهم رافعين بتاره، صوت أناني !
ينشدوا لاجله الأغاني،
ينشروا لأجلوا التهاني
يرسموه على كل فاني ..
كلهم واخدين بتاره ..
كأنه مخلوق لليتامى !
واستعادة حقه شرط لأجل نستجدي القيامة ..
أفلاطون دون ورايا : عرفوا معنى الحقيقة؟
قالها سقراط للضيوف ؟
اللي قال: إن الحقيقة: كامنة في معنى الحروف؟
واللي قال : إن الحقيقة: شيء ملازم للطريقة؟
واللي كان سامع وساكت: قاله في لحظة تجلي: ربي ما يحطك في ضيقة !
الحقيقة يا جماعة .. صوت أناكم؟
الحقيقة إني- لحظة- أبقى بينكم: بس مش عايش معاكم
قلبي بيمطر صباة .. فوق بيوت جدرانها دايرة
ع الحيطان مكتوب أسامي وضحكة خايبة ..
والقلوب كيوبيد .. قديم .. نفكر فيها الحنين لما ينشد عب حليم ..
لما تتنفس عينيك بنسى نفسي
فيها بشهد إني حي ولو هموت في عينيك عرسي
كنت عاصي وكنت تايه قبل منك!
كنت رغم قُصر كلامنا- حنة منك !
ليه لقيتك بعد موتي ؟

هو ده الحب الحقيقي ؟

ولا ده المعنى في طريقي ..

فيلسوف هيقولوا عني و إني شاعر

علموني عينيكي أسافر ..

يا هلال أحذب خزايني؟

هل يجوز في الحب إني :

لما أشوف قلبك أغني

أو أتوه في الوصف عني

أو أقول إني اشتهيتك في التجلي والتمني !

الوجود قبلك مهدد بالزوال والإنحسار..

وانتي بعينيك أويتي : للخيال معنى النهار ..

فاتركي كل اللي عاشوا والزميني!

يا طريق مخلوق لروحي وناي حنيني.

عزيت فؤادي في الغياب وندهت
إن ألقى حد يرد؟ الكل بلعه الصمت
كل الحناجر كالخناجر،
صوتها مسموم وانتهازي
رصاصك ع الحيلة: خاين: فيلسوف والتهمة نازي
كل نبلة في كل عين،
قصدها الشك المبين
حتى لو كان شيء مجازي
والأسامي شيء مكرر
سد خانة ..
كله بيبزر بنكتة ويطفح الدم ف عزانا
واللي باقي= المرائي،
والجهول
واللي عامل نفسه غيرهم، دوقوه كعب الكحول
وقفوا المشهد وعيدوا: من البداية
لقطة للمرحوم : بضره..وهوا نازل م السرايا
لقطة للمهزوم ف صغره، وهوا بيمجد بلاده
النشيد على رتم واحد: العساكر يا أمه عادوا
ايه في ايدك غير: أفيش
ايه ف صدرك غير: حشيش

املا صوتك م المآسي، وابتسم: بكره تعيش!
احنا حق علينا نرحف، في الخنادق لأجل روما!
هما احنا، واحنا هما .. وربنا يخلي الحكومة!
في الصباح هيذيعوا صوتنا
وفي المساء: هيسكنونا ..
و اللي متضموش بلاده ..
بكره هتضمه اللاجونا
سيما صيفي، وأجزخانة، و ع الروزانا ع الروزانا
لما تعطش،
لما تنهش، فيك ظنونك-
لما صوت العقل يتقل أو يخونك،
يبقى تتسكن وحيد!
امتى آخر مرة زارك، في المنام طيف الشهيد؟
امتى جاتلك بنت حلوة، وقربت ليك البعيد؟
امتى حسيت إن روحك: قادرة تكسر كل قيد؟
أصدمك: بس احنا أضعف؟ فيها ايه؟
هو لما نزلنا كنا، لينا أي خيال سياسي
أو مخطط للوزارة،
أو وصولو للتتحي عن هوى الكرسي الرئاسي
عشوائية، غوغائية بس بتأدي الغرض!
نازلة تهتف م الصباية والكبد ..
اتهزمننا بس لسه،

لسه قادرين ع المحاولة

اتهزمنا في كل جولة، ولسه جولة !

يا صحابي .. يا حبايب

اللي عايش، واللي غايب

لسه شبعان من أنينكم !

لسه في بيني وبينكم – خيط قرابة، فبفتكركم!

الحياة: مفهاس كتير..

غير يقين بالحب باقي ..

الصوان مازال في قلبي .. والعزاء فيكم عزائي ..!

الهميني

في التناي

و الهميني في الوصال

و الهميني لو تشاءني

في كل حال !

امزجي دمعي بدمعك، و أسمعني قلبي اللي سامعك، لو سنداتني = جسمي ضلعك،
مهما ألاقني طوعك.. ديني دينك، شرعي شرعك..

الغرق في البحر : مقتل ، و الغرق في الحب : أجمل ، و الوصول للمعنى يكمل :
لما أشوفك منتهايا ..

لما أغمض .. عيني عينك، حسك الدافي : يقرب، كنت قبلك كنت بهرب ، بس
دلوقتي لقيتني .. نظرتك ليا غويتني ، إني أفسر بيكي ذاتي ، و أرفع الراية:
ببسالة..

راية تشبه للعدالة .. لون حروفها فيه تجلي : للأمل بعد الغياب .. و البكا في
الحضن حالة تطوى أسفار الغياب ..

غني ليا عن الحقيقة، غني ليا عن الوطن .. و امسحي تاريخ بيسرد، كل صفحة
فيه شجن!، ده انهزامي ليكي بسمة ، فزت بيها على الزمن .. و ابتديت أكتب بقلبي:
إن نورك نور سمائي .. فالهميني لو تشاءني .. والهميني في التناي .. و اكتبني
بالدم وعد: فوق جبين الإنتفاضة، و إن حبك حب دافي .. حب فيه معنى الولادة!

المطر دمعة ولي ، يتولد منه القانون .. و القلوب مهما اشتتت: حدها شهد العيون ..
و انتي ظبية عنفوانها : أقوى من كل الأسود .. و إنتي زهرة لون دلالتها : أقوى من
عُشم البارود .. و انتي عود يخلق : مسافة .. للتفاني في الوصال .. فالهميني لو
تشاءني ، في كل حال !

قالوا : اكتب ، قلت توبة ، قالوا اوصف : قلت نوبة: إنها : إعجاز بسيط، فجأة وقفت
الشريط .. و ابتسمت .. و ابتدى تأويل خيالها: يرمى فوق الكلمة صمت .. و الكتابة

الكتابة .. غابة من فحش الحقيقة .. مهما قالوا لك بريئة .. مش بريئة! فيها يتم
الإستعارة بالخيال .. فيها يأس و فيها مكر .. لما تبدأ أي سطر .. تلقى أشجانك
تخونك ، في السؤال!

انت مين من غير وجودها، أرضها ولا حدودها ، طفلها ولا شهيدها..
يأسها ولا بارودها،

انت ختيارة ف بلدها ، شائلة فوق النحر أكبر فكرة بتأسس خلودها !

كل ده : لما بطيفها: أيقظت فيك التداني !

فابتسم كل أما تسرح ، و ابتسم لما تعاني

إنها في كل معنى ، معنى فاق كل المعاني

و إنها في كل غنوة : غنوة أحلى من الأغاني !

و إنها لو بس طللت : للفقيد هيخف فقده

و إنها لما تميل .. ع الهوى : بيزيد نداه !

و إنها كل أما توصف : تلقى كل الوصف تاه

فالهمني فالتنائي

و الهمني في الوصال

و الهمني لو تشاءني

في كل حال

اليومية ..

هيا هيا ..

و الطريقة الأجنبية

أقوي من ضحكة بهية

كاس ف كاس ، و الضفاير ليها ناس ، ناس تفك الإلتباس ، تهزم الصوت الأناني ..
ترمي في البركة الحزينة ، طوبة من وحي الأماني ..

اليومية هيا هيا .. و الحقيقة لسه جاية .. و الشهيد في القلب خالد .. مهما ترموا
اللوم عليه أو تخلوا اللوم عليا

انتظار الصبر صبر ..

و انعدام الصوت .. هتاف ..

كنت خايف .. كل غدر

بس أنا حرمت أخاف ..

نظرتي للشيء تفرّق

بين حقيقته و بين خداعه ..

الوطن .. مربوط في يأسه

و الفقير مقطوع ذراعه ..

صورة اللمة تضحّك ..

صورة الوحدة بتقتل ..

في الزحام ببيان تملي

مين في توب الحزن أجمل ؟

و الملامح فيها كسرة ..

انت مجروح زي ؟ بصره

يلا بينا نبل ريقنا ..

بالوجع و الضحك خمرا

ناس بتعشق صوت غناها، و المتاهة = ضحكة صفرا

في الغيوم في صوت بيهمس ، في النجوم في نور بيلمس ، في العيون السودا :
بلبس

لبس عاشق .. غاوي سيرة .. اخلطوا بالدمع قلبي .. واحلفوا بالليل و ناره : إن دي
المره الأخيرة ..

كنت صوفي ،

و كنت ثاير .. كنت حبسة ف كون براح .. اللي فات زي اللي رايح ، و احنا مش
قد الجراح ..

كلنا بنعبد صورنا .. كلنا بننشد حقيقة .. كل عاشق ليه مشايخه وكل ثاير ليه طريقة
..

بس خرم النور يساع .. إننا في لحظة دفاع .. أقوى من كل اندفاع .. أقوى من خط
الدفاع، أبقى من نور اليراع ..

لحن خايف ع البيانو ، يكسر النوته بتجلي ، تيجي جنبي ؟ - يلا بينا، ياريت تملي ..

كلمة مني و كلمة منك، قلت أجاري الروح في روحك .. كان حنين ؟ كنت زيه !
جرحه هين ؟ كنت زيه .. وشه : فيه همس المقابر ..

شاهد القبر : اللي شايل بين أنينه: لحن عابر ..

كنتي عايزة و كنت عايز .. إني أفكر إني صعب ! و إني رغم الفرحة عارف إن
كتر الضحك ذنب

أوصفك بس اوعديني، قبل تدوين الوصية .. إني لما أشتاق أجيلك : في المنام و
تكوني ليا ..

و أمسح الوحشة في جوانحك، و أقرأ فوق القلب: آية، و أمشي بالنور الإلهي، فوق
جوارحك للنهاية..

صوتي إيه لو جف صوتي ، و كنتي تايهة ! روعي ايه : لو غاب حضورها و طفوا
نورها و كسّروا بالبعد نايتها ..

الحداء ؟ للشمس واجب ! بس أنا بهوى القمر !

قلبي شاييل حنة منه .. فاعشقوا هذا القدر !

اليومية ..

مش يومية ..

و الحقيقة ليها دية ..

بس أنا مسامح ف روعي ..

لو قبلتي تكوني ليا !

لا أنا رضوي
و لا أنتَ مرید
لكني مرید
و كل ما تلمعك عيني
يئن الصبر ف التنهيد

--

لا أنا رضوي ولا أنتَ مرید
لكني مرید
و كل ما ألف ف الحضرة
أقرب ف ابقى لسه بعيد

--

لا أنا رضوي و لا أنتَ مرید
لكني مرید
بعيش فيكي كما ليلي
و أموت فيكي كأني يزيد

--

لا أنا رضوي و لا أنتَ مرید
لكني مرید
و كل ما أتوه ف إمعانك
أقول يا رب صب و زيد

هَبْ الحنين م الشرق

خبيني ف ضلوعك،

خرز أو برق

وضيني من روعك،

حبيب أو ولي

يا آل محمد

احنا فين من علي

الصبح : بين شَقَتَيْنْ يميل زاوية

و تفيد ب إيه الكرامة

و القلوب خاوية !

"إن كنت ناوي ع الوداع .. ناوية"

"ارحل!"

"أرحل؟!!"

لمين و لفين ؟!

و الكون أساساً كله بين رمشين

و منين ما أتوه عنها أتوه فيها

و منين ما أخيبها .. أعريها

أمشي في براحها و هيا تَبْرَحني

أستر : هواها .. هواها يفضحني

اكتب : بلاها !! .. بلاها يجرحني !

لما غزالها يروق : تفرّحني

و أما يصيبها الشوق : تَبَرَّحني

و أما أقول : أواه .. تدبّحني !

و أما يشيخ الغُنا تقول بحني

ينفخ حنيني الغنا .. لأجل الوجع يبرد !

غنيتي ليه ليا أنا .. و ندهتي يا أحمد .

دمعت ليه ف الصلاة؟

- من زحمة الأسئلة

قالت لحد الصراط

و سابنتي في البسمة

--

قصيت جناحي الريش

سألوني : قلت مفيش

عيني ضباب ف ضباب

و في إيدي قرش حشيش

--

كنت الجميل الخجول

عجرت زي الكهول

بالعرض كان الكتاب

وأنا بقرا فيه بالطول

--

لف الشجن مغزله

لبسني توب فصله

حاولت إني أخلعه

قاللي الوجع طوله

--

أشبهه وما اشبهنيش

أبذل لكن ما الأقيش

عائش كأني بعيش

ميت كما الحرافيش

--

كل العيون بتبص

قصر يا عم ورص

أول ما ببدأ طريق

ليه بينتهي في النص؟

--

جاوزت حدي ونديت

عيني خانتني بكيت

أتاريني وسط الزحام

زاد الوجع .. خفيت